

Tetun

Prezidente lakonkorda ho proposta ba Orsamentu Jerál Estadu tinan 2016

29 de Dezembro de 2015, 17:19

Prezidente Taur Matan Ruak, ohin veto ona proposta hosi Orsamentu Jerál Estadu ba tinan 2016, tanba lakonkorda ho "investimentu ba projetu infraestrutura laho retornu efetivu".



@prezidencia republika Timor-Leste

Iha komunikadu ne'ebé fó sai ohin hosi Palásiu Prezidensiál haktuir katak Prezidente Repúblika veto ba proposta Orsamentu Jerál Estadu (OJE) ba tinan 2016 nian, no devolve hikas ba Parlamentu Nasionál.

Tuir komunikadu, fó veto tanba lakonkorda ho prioridade hirak ne'ebé haktuir iha OJE 2016 nian, bazeia ba diskusaun iha Parlamentu Nasionál.

"Iha tempu ne'ebá, haktuir katak mosu diverjénsia ba iha proposta OJE tinan 2016 nian, tanba halo aumentu ba projetu infraestruturá laho retornu ne'ebé efetivu, hanesan ba Zona Espesiál Ekonomia Sosiál Merkadu (ZEEMS) ka Projetu Tasi Mane no hamenus despeza públika hanesan ba iha setór Saúde, Edukasaun nomós Agrikultura", fó sai komunikadu.

Durante diskusaun iha Parlamentu Nasionál, Prezidente "halo ona alerta kona-ba importánsia ba promosaun investimentu ba bee mos nomós saneamentu báziku, atu nune'e bele hadia povu ninia moris".

Iha mensajen ne'ebé haruka ho veto OJE, Prezidente Repúblika mos bolu atensaun atu "garante dezvoltimentu sustentável iha rai laran, aumenta reseita la'os petrolífera no hamenus rekursu ba Fundu Petrolífera nian, tanba tuir limite anuál ba rendimentu sustantadu ultrapasa liu dobru".

Tuir komunikadu, iha mensajen ne'ebé haruka ba Parlamentu Nasionál, xefe Estadu ne'e mos analiza kriasaun hosi "Fundu Infraestruturá" foun ida, bazeia ba regra hosi Lei Orsamentu no Jestaun Finanseira ba fundu espesiál nian. "

"Prosesu lejislativa ba OJE tinan 2016, agora daudaun entrega ona ba deputadu sira iha Parlamentu Nasionál", tuir komunikadu fó sai.

Iha 19-dezemburu, Parlamentu Nasionál aprova definitivamente OJE ba tinan 2016 ho valór dolár rihun milloens 1,56, hafoin forsa polítika sira halo diskusaun naruk.

Testu orsamentál ne'ebé hetan aprovasaun ba iha jeneralidade no ho unanimidade iha 03-dezemburu liu ba, hetan alterasaun sanulu resin, ne'ebé maioria korensponde ba realokasaun gastu, maibé la fó impaktu ba montante ikus hosi orsamentu Estadu nian.

OJE ba tinan 2016 ho valór bot dolár rihun milloens 1,56, ho despeza hafoin halo alterasaun ne'ebé inklui mos gastu ba iha saláriu milloens 181,87 nomós vensimentu, dolár milloens 449 ba bens nomós serbisu, inklui Fundu Dezvoltimentu Kapitál Umanu.

Sei halo transferénsia públika ho valór milloens 476, milloens 436,47 ba kapitál dezvoltimentu no milloens 17,57 ba kapitál menór. Valór hosi fundu autónomu foun hosi infraestruturá maka dolár milloens 434,63.

Meza Parlamentu Nasionál haruka ona porposta alterasaun 46 ne'ebé submete ba apresiasaun hosi komisaun ad-hoc ida, maibé aprova de'it 33.

Hosi hirak ne'ebé importante, halo mos alterasaun ba proposta hosi partidu tolu entre haat haat ne'ebé hetan kadeira iha parlamentár (CNRT, Fretlilin ho Frente Mudança) ba transformasaun atuál Fundu Infraestruturá ba iha "fundu autónoma, dota ba personalidade jurídika, autonomia administrativa nomós finanseira".

SAPO TL ho Lusa

[Kona-bá](#) [Kondisaun Utilizasaun](#) [Polítika Privasidade](#) [Kona-bá Cookie](#) [Tulun](#)

[SAPO](#)

Produsaun hosi [SAPO](#) - Ho direitu hotu-hotu rezervadu.